

Revolusi Baru Bumi Hijau-Amanat Pak Lah



Tuanku Canselor, Sultan Sharafuddin Idris Shah mengurniakan Ijazah Kehormat Doktor Pembangunan Pertanian kepada Tun Abdullah pada Majlis Konvokesyen UPM ke-33 semalam.

SERDANG, 9 Ogos – Tugas negara dalam bidang pertanian masih belum selesai dan usaha perlu dilipat gandakan untuk menjadikan bidang pertanian sesuatu yang menarik, moden dan menguntungkan selain mencipta sumber kekayaan baru demi merealisasikan revolusi baru bumi hijau yang dapat membawa rahmat kepada sejagat.

Tun Abdullah Ahmad Badawi berkata sektor pertanian merupakan penyelesaian terbaik dalam menangani krisis makanan kerana peningkatan harga makanan telah menyebabkan permintaan terhadap hasil pertanian telah meningkat dengan mendadak.

Amanat beliau disampaikan pada Majlis Konvokesyen Universiti Putra Malaysia (UPM) ke-33 yang berlangsung di Pusat Kebudayaan dan Kesenian Sultan Salahuddin Abdul Aziz Shah, semalam.

Pada majlis tersebut, Tuanku Canselor Sultan Sharafuddin Idris Shah Alhaj Ibni Almarhum Sultan Salahuddin Abdul Aziz Shah Alhaj telah berkenan untuk mengurniakan Ijazah Kehormat Doktor Pembangunan Pertanian kepada mantan Perdana Menteri Malaysia Kelima pada sesi pertama majlis konvokesyen tersebut atas sumbangan besar beliau dalam memartabatkan kembali bidang pertanian negara.



"Sekiranya pembangunan pertanian dapat dirancang dan dilaksanakan dengan cara yang betul, negara kita akan mempunyai bekalan makanan yang mencukupi, sumber pendapatan baru akan dapat diwujudkan melalui produk-produk asas tanah hasil penyelidikan dan pembangunan (R&D) serta penggunaan bioteknologi.

Akhir sekali dapat memelihara alam sekitar kerana penggunaan teknologi baru dapat menggunakan tanah-tanah terbiar tanpa memusnahkan hutan dan alam flora kita," katanya dalam ucapanbalas pengurniaan di sini.

Beliau turut berkata visinya dalam sektor pertanian di Malaysia amat jelas, iaitu keperluan penggunaan teknologi untuk menjadikan sektor pertanian di negara ini lebih cekap lagi produktif kerana walaupun negara tidak memiliki tanah yang luas tetapi setiap inci tanah diberkati dengan pelbagai kekuatan dan kekayaan.

"Kita perlu memegang konsep 'pertanian itu perniagaan' supaya sektor pertanian dapat dijalankan secara besar-besaran dan secara komersil untuk memberi peluang kepada pengusaha-pengusaha industri asas tanah umpamanya merasai pulangan lumayan," katanya yang turut hadir bersama isteri beliau, Tun Jeanne Abdullah.

Tun Abdullah semasa pemerintahannya telah berjaya memacu pembangunan industri asas tanah sehingga tertubuhnya sebuah kementerian khusus bagi membangunkan produk-produk pertanian dan turut melancarkan dasar bioteknologi nasional yang bertujuan untuk menambah nilai kepada sektor pertanian negara.



Tun Abdullah ketika menyampaikan ucapanbalas pengurniaan di UPM.

Disediakan oleh Seksyen Media dan Publisiti, Bahagian Komunikasi Korporat UPM.